

13. oktober 2006

UKA 2006/30

**Aningaasarsianit akileraarutit pillugit Inatsisartut inatsisissaattut siunnersuut
pillugu**

Inatsisartut Akileraartarnermut Akitsuusiisarnermullu Ataatsimiititaliaata

ISUMALIUTISSIISSUTAA

siunnersuutip appassaaneerneqarnerani saqqummiunneqartoq

Inatsisartut Akileraartarnermut Akitsuusiisarnermullu Ataatsimiititaliaat
suliarinninnermini ukuninnga inuttaqarpoq:

Inatsisartunut ilaasortaq Augusta Salling, Atassut (siulittaasoq)
Inatsisartunut ilaasortaq Agnethe Davidsen, Siumut (siulittaasup tullia)
Inatsisartunut ilaasortaq Lars Emil Johansen, Siumut
Inatsisartunut ilaasortaq Agathe Fontain, Inuit Ataqtigiit
Inatsisartunut ilaasortaq Lene Knüppel, Demokraatit (sinniisussaq)
Inatsisartunut ilaasortaq Tommy Marq, Siumut (sinniisussaq)
Inatsisartunut ilaasortaq Jens Lars Fleischer, Siumut (sinniisussaq)

UKA 2006-imi siunnersuummik siullermeerineq tunngavigalugu inatsisatut
siunnersuut oqaaseqaatitai ilanngullugit tusarniaanermiillu akissutit tiguneqarsimasut
Inatsisartut Akileraartarnermut Akitsuusiisarnermullu Ataatsimiititaliap
misissuataarpai. Siullermeerinermi apeqqutit saqqummiunneqartut
sukumiinerusumik ersersinneqarnissaat anguniarlugu Aningaasanut Nunanullu
Allanut Naalakkersuisoq Akileraartarnermut Akitsuusiisarnermullu
Ataatsimiititaliamut allakkamik ulloq 2. oktober 2006-imi nassiussaqqarpoq. Allagaq
isumaliutissiisummut matumunnga **Ilanngussaq 1-itut** ilanngunneqqarpoq.

Atuinnermut akiliutit akileraaruserneqartarnerat pillugu allannguutit
akileraarusiineramik nutaamik imaluunniit akileraasutinit isertitat qaffariarnerinik
nassataqanngimmat ilaatigut Naalakkersuisunut ilaasortap allagani
erseqqissarneqqarpoq.

Inatsisissatut siunnersuut pillugu tusarniaaneq.

Tusarniaanermut allakkiaq malilugu Akileraartarnermut Pisortaqarfiup tusarniaanera piffissami ulloq 19. juni 2006-imit 20. juli 2006-imit ingerlanneqarsimavoq. Akileraartarnermut inatsisit allat marluk aamma tusarniaanermut ilaatinneqarsimapput, tak. UKA 2006/29 aamma UKA 2006/32.

Tusarniaanermut killiliussap sivisussusissaanik aalajangersaanermut isornartorsiuneq saqqummiunneqarpoq. Sulisitsisullu peqatigiiffiat ILIK ima tungavilersuivoq, siunnersuut akulikitsumik allanneqarsimasunik quppernernik 100-junik amerlanerusumik imaqartoq, akileraartarnermut tunngasumi inatsisissatut siunnersuutinut aamma imaqarluartunut allanut ilanngullugu nassiunneqarsimasoq, kiisalu siunnersuut ima kingusitsigisumi tiguneqarsimasoq allaat atortussanut nassiunneqarsimasunut tusarniaanermut akissutissap suliarinissaanut ullut suliffiusut quliinnangajaasimallutik. Pissutsit taamaanneranni tusarniaanermi atortut tamakkerlugit illersorneqarsinnaasumik suliarinninnissammut akissuteqarnissamullu ILIK periarfissaqarsimanngilaq.

Tusarniaanermut atortussat annertussusaat katitigaanerallu kiisalu tusarniaanermut piffissaliussap aasaanerani sulinngiffeqarnerup nalaanut inissinneqarsimanera eqqarsaatigalugit tusarniaanermut killiliussap sapaatit akunnerinit tallimanit sivisunerunnginnissaa aalajangerneqarsimammat tamanna Akileraarnermut Akitsuusiisarnermullu Ataatsimiititaliamit naammaginangitsutut isigineqarpoq. Piffissap sullissinermut atorneqartup ilanngunneqarsimanera pissutigalugu tusarniaanermut akissuteqarnissamut killiliussaq ilisimatitsissutigineqartut malillugit sivikinneerarsuusussaagarmat tassunga atatillugu annertunerusumik eqqarsarnartoqartitsinissamut peqquassaqalersitsivoq.

Tassunga atatillugu ataatsimiititaliap ilisimatitsissutigissavaa UPA 2000/9-p suliarineqarnerani Inatsisartut Inatsisit Atortinneqarnerannut Ataatsimiititaliaata oqaatiginikummagu, tusarniaanermi akissuteqarnissamut killiliussaq nalinginnaasumik sapaatit akunnerinik sisamanik sivikinnerusumut aalajangersarneqartassanngitsut. Taamaalilluni siunnersuut teknikkikkut ajornarkusoorsimappat imaluunniit piffissaq tusarniaaffik aasaanerani sulinngiffeqarnerup nalaaniissmappat il. il. killiliussap sivitsuiffigineqarnissaa tungavissaatitaavoq. Inatsisinik nalersuisarnermut maleruaqqusat atuuttut naapertorlugit tusarniaanermut akissuteqarnissamut killiliussaq aallaavittut isigalugu minnerpaamik sapaatit akunnerinut sisamanut, sulinngiffeqarnerullu nalaani sapaatit akunnerinut arfinilimmut – arfineq-pingasunut aalajangersarneqarpoq.

Tamanna tungavigalugu siunissami Akileraartarnermut Akitsuusiisarnermullu naalakkersuisoqarfiup siunissami tusarniaanermut akissuteqarnissamut killiussaq naammaginarnerusoq aalajangersarsassagaa Akileraartarnermut Akitsuusiisarnermullu Ataatsimiititaliamit inassutigineqassaaq.

Tusarniaanermi peqataasimasut tusarniaanerullu inernerit pillugit inatsisissatut siunnersuummut nalinginnaasumik ilanngussat innersuunneqarput.

Inatsisissatut siunnersuummik Inatsisartut siullermeerinerat.

Siullermeerinermi inatsisissatut siunnersuut partiinit tamanit taparserneqarluarpoq.

Inuussutissarsiutinik ilinniartitaanermit atatillugu suliffeqarfiit annertunerusumik peqataasinnaaneranut taartitit suliffeqarfiit akileraasutaasa appaaffigineqarsinnaanerit Inuit Ataqtatigiinnit ujartorneqarpoq. Tassunga atatillugu Akileraartarnermut Akitsuusiisarnermullu Ataatsimiititaliap eqqaasitsissutigiumavaa, sulisoqarnermut akitsuut pillugu Inatsisartut inatsisissaattut siunnersuut (UKA 2006/9) taassuma tungaanut alloriarnertut isigineqarsinnaammat. Sulisoqarniarnermi ilinniartitseqqittarnerup piginnaassutsikkullu inerisaanerup aningaasalersorneqarneranni inuussutissarsiortut isumagisassaata assigiiaarnerusumik agguataarneqarnissaat siunnersuutip matuma nassatarisussaavaa. Siunnersuut aqqutigalugu iluanaarutaasussat amerlissutaat 12 mio. kr.-it inuussutissarsiutitigut ilinniartitaanerit siunertaanut atugassat pissarsiarineqarnissaat naatsorsuutigineqarpoq.

Sulilluni misiliinermi inissanik pilersitsinissaq eqqarsaatigalugu aningaasarsianit akileraarutit pillugit inatsisiliornermut atatillugu pineqartup maleruagassiorfiginissaa naleqquttuunngitsoq ataatsimiititaliaq isumaqarpoq. Sulilluni misiliinermi inissanik pilersitsinissap taparserneqarnissaanut inatsisit allat, soorlu Suliariumannittussarsiuussisarnermut Inatsisartut inatsisaat imaluunniit Kalaallit Nunaannut suliffissarsiortut killilersimaarnissaat pillugu Inatsisartut inatsisaat iluarsiiiffigineqarsinnaanerit pisariaqarsinnaasoq ataatsimiititaliamit eqqumaffigineqarpoq. Eqqarsaatersuut taanna siunissami inatsisissanik piareersaalluni sulinermi ilanngunneqartassasoq Naalakkersuisunut kaammattuutigineqarpoq.

Inatsisissatut siunnersuutip siullermeerneqarnerani suliffeqarfiit atortussiassanik aatsitassanik pisunik piiiaanermik kiisalu sermip erngullu avammut nioqqutissatut atornerneqarnissaannik ingerlatsisut § 60, imm. 2-mi immikkut aalajangersaaffigineqarnerisa attatiinnarniarneqarneranut tunngaviusoq Atassummit apeqquteqarfigineqarpoq. Tassunga Naalakkersuisunut ilaasortap oqaasiinnartigut akissutaa Akileraartarnermut Akitsuusiisarnermullu Ataatsimiititaliap ima paasivaa, suliffeqarfinnik pineqartunik inatsisitigut assigiinngisitsinerut aalajangersagaq paasineqassanngitsoq, kisiannili inatsisiliorfigineqartup pineqartup ingerlatsiiffigineqarnerani pisariaqartitanik nalinginnaasumik salliutitsiniarnerinnaasoq. Akissut taanna, Naalakkersuisunut ilaasortap allagaanut 2. oktober 2006-imeersunut aamma ilanngunneqarsimasoq, Akileraartarnermut Akitsuusiisarnermullu Ataatsimiititaliamit tusaatissatut tiguneqarpoq.

Akileraartarnermut Akitsuusiisarnermullu Ataatsimiititaliap isumaliutersuutai.

Siunnersuutip siullermeerneqarnerani Inatsisartut isumaqtatigiissut assigalugit inatsisissatut siunnersuut tamakkiisumik taparserneqartariaqartoq Akileraartarnermut Akitsuusiisarnernullu Ataatsimiititaliaq isumaqarpoq. Inuussutissarsiortut atugaasa, siullertut pingaarnertullu suliffeqarfiit akileraarutaasa procentianik assigiiaartunngortitsinissaq oqilisaanissarlu, kisiannili aamma suliffeqarfimmik

piginnittut suliffeqarfiup piginnittup suliffeqarfiutaatalu akornanni ataatsimoortitsilernissamik kissaateqartoqartillugu inatsimmit oqilisaavigineqassapput. Suliffeqarfiit tamakkiisuusumik akileraartussaataannigitsunut atuinnermut akiliutit akilerneqarneranni atuinnermut akiliutaasa akileraarutitaannik tigumminninnerup nunami maani akileraartarnermik nakkutilliinissap eqqarsaatiginissaata akileraarutillu akilerneqarnissaasa qulakkeernissaat isiginiarneqarpoq, tamannalu ataatsimiititaliamit naammagisimaarneqarluni maluginiarneqarpoq. Kiisalu aningaasarsianit akileraarutit pillugit inatsisip tamarmiusup paasiuninartullu, inatsisissatullu siunnersuummut oqaaseqaatit nutartikkat ilaatinneqartut akuersissutigineqarnissaat ataatsimiititaliamit qujarunneqassaaq. Tamanna innuttaasut inatsisitigut aammalu inatsiseqarnermi taama qitiutigisumut ilisimasaqarnerannut annertuumik siuariarnermik kinguneqassaaq.

Akileraartarnermut Akitsuusiisarnermullu Ataatsimiititaliap inassuteqaataa.

Inatsisissatut siunnersuut ilusimisut iluseqarluni saqqummiunneqartoq Inatsisartut aappasaanerinerimi akuersissutigissagaat Akileraartarnermut Akitsuusiisarnermullu Ataatsimiititaliap isumaqatigiittup siuliani oqaaseqaatigineqartut aqutugalugit inassutigaa.

Taamatut oqaaseqarluni Inatsisartut Akileraartarnermut Akitsuusiisarnermullu Ataatsimiititaliaata siunnersuut Inatsisartunut aappasaaniigassanngortippaa.

Augusta Salling
Formand

Lars Emil Johansen

Agathe Fontain

Agnethe Davidsen

Lene Knüppel

[Ilanngussaq 1](#)

[Ilanngussaq 2](#) (pdf-format)